

ODOEJE LIWAKATE JOÃO

João anakaagijo me idítini anodaagee lewiga Jesus, odaa nigidiaagidi jigijoa itiwatadigidi eletidi liwakatedi.

João yalagata Jesus me Lionigi Aneotedogoji, codaa midioka limedi miniwa miniwataga Eliodi. Aneotedogoji liciagi lokokena, odaa leeditibige mejonagateloco latalaga, codaa me joleegatibige me jaoga ane igenaga. Nige jelogotagatalo ane gobeyacegeco, jaigo me godapitagaditema. Nigina oko aneiteloco lokokena ailigoitice nioxoa. João yalagatiogi nigina ane micataga daga laxokodi, lionekadi, nigaanigipawaanigi leegodi anodaagee meniwigatakanaga, odaa noxogotiniwace me degenegegi oyemaateda otegexaagaga odioteci lakataga nigina oko anida aneetege nigina iigo. Eo leemidi micota mina ane dakapetege Cristo, pida Aneotedogoji Liwigo yakadi me nikeetogowa anewi. Eo leemidi me dogoika digica ane ninaaletiniwace. Codaa yelogoditiogi anodaagee moyowoogodi nigica niwigo ane yaxawa oko me dotaga domige icogoticogi miniwataga Aneotedogoji, ogoa domige aicogoticogi. Yalagata anodaagee nigica lemaanaganegegitedogodomi Aneotedogoji. Eledi yalagata nigina oko ane nakato Jesus, Lionigi Aneotedogoji, nigida gela lewiga. Nogowidijedi lotaga João yalagata nigina oko ane nakato Goniotagodi me igeke loniciwaga nigina ane beyagi, ane dineetogowa, codaa yalagata me leeditibige me joxaxinaga niginoa niwicidi noenataka.

Notaga aneote godewiga

1 ¹Jidikonagatibigagajitiwaji, godalagatalo Nigijoa anoditalo me “Notaga”, aneote godewiga, Nigijoa anakaaginiwa nigijo maleekoka dinoe nigina iigo. Nigida moko jajipaaatalo Nigijoa aneote godewiga, codaa ijoa me jinataga. Jatacologojogotece me jiwinaaga, codaa me jibagatelogo. ²Nigijo naga dinikee Nigijoa aneote godewiga, odaa ja jinataga. Odaa jelogotagatibece Nigijoa ane jinataga, Nigijoa aneote oko midioka limedi me newiga, ane ideite miniwataga Aneotedogoji ane Eliodi, Nigijoa ane dinikeetedogowa. ³Jatematiiगतगawatiwaji nigijoa ane jinataga, codaa ane jajipaaatalo, amaleegaga akaami eleditetiwaji gadexocitogogi. Odaa ewi me godexogotege Godiodi, codaa me Lionigi ane Jesus Cristo. ⁴Jidiगतibigagajitiwaji nagadi notaganagaxi jaogatibige meliodi maniniitibecetiwaji.

Leeditibige me idejonaga manitaga nilokokena Aneotedogoji

⁵Natematigo ane natematitedogowa Jesus, jatematiiगतगawatiwaji. Nigida natematigo yalagata Aneotedogoji me liciagi lokokena, codaa agica

nexocaga miniwataga. ⁶Nigejinaga me godexogotege Aneotedogoji, pida eidejonaga nexocaga miditaga nibeyacaga, odaa jiwitakaga, ajaoga nigica anewi. ⁷Pida nige idejonaga manitaga lokokena liciagi Aneotedogoji me ideite manitaga lokokena, odaa okotawece godilagatiwage, codaa lawodi Jesus, Lionigi Aneotedogoji, napitagadi inoatawece gobeyacegeco.

⁸Nigejinaga me digica gobeyacegegi, odaa okomogokota idininaalenaga, codaa agica mokotaga nigica anewi. ⁹Pida nige idinelogotagatalo Aneotedogoji nigina mida gobeyacegegi, odaa eote micota nigijo ane ligegi, codaa leegodi me igenaga, odaa agalee godiloikatidi leegodi gobeyacegegi, pida iwilegitetema godaalegena inoatawece ane beyagi. ¹⁰Nigejinaga me digica gobeyacegegi, odaa jegejinagatalo Aneotedogoji me awitakegi (igaataga Ijaagijoa yelogodi minoa gobeyacegeco), odaa lotaga Aneotedogoji agicoa mokotaga.

2 ¹Ionigipi yemaanigipi. Jiditibigagajitiwaji nagadi notaganagaxi jaotibige me dagawii ane beyagi. Pida nigica aneo libeyacegegi, ini oko ane nigiwatogodici me dipokotogoloco lodoe Aneotedogoji Godiodi. Nigininwa ane godelege, Jesus Cristo ane igenaga. ²Ijaagijoa yeleo eotedibige Aneotedogoji me dagadiaa yelatedogodomi leegodi gobeyacegeco. Jesus Cristo ayeleo daga leegodi okomoka gobeyacegeco, pida leegodi libeyacegeco inatawece okotigi nigina iigo.

Leeditibige mejiwagataga liigenatakanegeco Aneotedogoji

³Nigejiwagataga liigenatakanegeco Aneotedogoji, odaa agica daga jawienatakanaga me jowoogotaga Aneotedogoji. ⁴Nigina oko anee me yowoogodi Aneotedogoji, pida ageyiwagadi liigenatakanegeco, nigini oko awitakegi, codaa nigica anewi agica minitaga. ⁵Pida nigina oko aneyiwagadi Aneotedogoji lotaga, ikee mewi me yemaa Aneotedogoji manitawece laalegena. Codaa jigidaa jowoogotagatece mewi me godexogotege Aneotedogoji. ⁶Nigina oko anee me yexogotege Aneotedogoji, leeditibige monowiigotalo Jesus Cristo, anodaageeteda maleegijoa me yewigatedeloco digoina iigo.

⁷Inioxadipi yemaanigipi. Ajiditibigagaji niigenatakanegegi gela, pida jiditibigagaji jotigide niigenatakanegegi anidioka limedi majipaata nigijo odoejegi noko maleekoka anakatoniteta Cristo. Nigijo jotigide niigenatakanegegi joanigidaagida nigijo natematigo anidioka limedita majipaata. ⁸Pida natigide epaa jiditibigagajitiwaji gela niigenatakanegegi. Anodaageeteda Cristo maleegijoa me yewiga digoina iigo ikee mewi nigida niigenatakanegegi. Codaa makaamitiwaji jagaga ikeeni mewi nigida niigenatakanegegi leegodi aneni me gadewikitiwaji. Odaa jiditibigagaji gela niigenatakanegegi leegodi ja ma nexocaga, odaa lokokena anewi jigídi.

⁹Nigini oko anee me ideí manitaga lokokena, pida yelatema nioxoa, odaa nigini oko idokee me ideí nexocaga. ¹⁰Pida nigina oko ane yemaa nioxoa бага ideí manitaga lokokena, odaa agica ane yakadi meo libatiigi, aliciagi nigina

oko ane dixipe migotigi nexocaga. ¹¹Pida nigina oko ane lelegedi nioxoa idei miditaga nexocaga. Idioka limedi migotigi nexocaga, codaa ayowoogodi nigica ane diiticogi leegodi nexocaga eo me daga yakadi me yatetibece.

¹²Ionigipi yemaanigipi. Jidikotibigagaji leegodi Aneotedogoji agalee gadiloikatititewaji leegodi gabeyacegeco, leegodi Cristo ja yeletedogodomi. ¹³Natigide, akaamitiwaji ane gadiciagi eniododipi. Jidikotibigagajitiwaji leegodi jogowoogoti Nigijoa anakaaginiwa nigijo maleekoka yoeteda Aneotedogoji nigina iigo. Akaamitiwaji ane gadiciagi lionekadi. Jidikotibigagajitiwaji leegodi nagagekeni nigijo abeyacegegi, diaabo. Akaamitiwaji ane gadiciagi nigina ionigipi yemaanigipi. Jidikotibigagajitiwaji leegodi nogowoogoti Aneotedogoji, Godiodi.

¹⁴Akaamitiwaji ane gadiciagi eniododipi. Jidikotibigagaji leegodi mowoogoti Nigijoa anakaaginiwa nigijo maleekoka yoeteda Aneotedogoji nigina iigo. Akaamitiwaji ane gadiciagi lionekadi. Jidikotibigagaji leegodi me gadoniciwatitiwaji me iwagatakani. Aneotedogoji lotaga idioka limedi me ideite catiwedi gadaalegenali, codaa jagagekeni nigijo godaxakawa abeyacegegi.

¹⁵Jinagalideetalotiwaji lakataga nigina oko anida aneetege nigina iigo, codaa jinaga dagaxa memaani niginoa aninoa nigina iigo. Nigina oko ane yemaa lakataga nigina oko anida aneetege nigina iigo ayemaa Aneotedogoji Godiodi. ¹⁶Igaataga inoatawece ane lakataga nigina iigo aicogoticogi miniwataga Aneotedogoji, Godiodi. Niginoa godaalegena lemaanaga ane beyagi, codaa nigina me jemaanaga okanicodaagica ane jinataga, codaa nigina me idinanenagatece godakataga, inoatawece icogotedinigi nigina iigo, aicogotedicogi miniwataga Aneotedogoji, Godiodi. ¹⁷Nigina iigo icota me daa, codaa inoatawece niginoa anoyemaa nigina oko anelatibige nigina iigo ixomagatedijo. Pida nigina oko aneo ane yemaa Aneotedogoji, joaniginiaa idioka limedi me yewiga miniwataga Aneotedogoji.

Nigina oko ane lakapetegi Cristo

¹⁸Ionigipi yemaanigipi. Ja nipegi me daa nigina iigo. Ajipaatiwaji modi menagi nigina enegegi lakapetegi Cristo, codaa nigina natigide, eliodi lakapetedipi Cristo ja dinikeetibigiwaji. Joanigidaa leegodi me jowoogotaga naga nipegi me daa nigina iigo. ¹⁹Nigina analee lakapetedi Cristo oika me idei mokotaga leegodi agica anejinagatege. Igaataga degelatigi mokotaga, dagawini inaagite mokotaga. Pida etigodaladi owotibige me jowoogotaga me ijotawece agica anejinagatege.

²⁰Pida Cristo yajigotedagawatiwaji Liwigo, joanigidaa leegodi mowoogotititewaji inoatawece anepewi. ²¹Ajidikotibigagajitiwaji daga leegodi me dogowoogoti anewi. Pida jidikotibigagajitiwaji leegodi nogowoogoti anewi, codaa leegodi mowoogoti nigina ane diwitaka, me digica aneetege anewi.

²²Nigina oko anee Jesus me daga Lionigiteda Aneotedogoji, codaa anee maleediginiaaginiwateda Nigicoa ane niige Aneotedogoji meote godewiga, nigini

oko eliodi me diwitaka, codaa lakapetegi Cristo. Lige gitibece ica Aneotedogoji me daga Godioditeda, codaa Jesus me daga Lionigiteda Aneotedogoji. ²³Nigina oko anee Jesus me daga Lionigiteda Aneotedogoji, joaniginiaagini agicoa Aneotedogoji ane Godiodi minitaga. Pida nigina oko anee Jesus me Lionigi Aneotedogoji, joaniginiaagini biginiwa Aneotedogoji ane Godiodi minitaga.

²⁴Enice oteteni catiwedi gadaalegenali niginoa notaga anoditece gotiwagatakanegegi anajipaatalo nigijo noko maleekoka anakatoniteda Goniotagodi. Nogotetenitetiwaji catiwedi gadaalegenali nigijoa notaga anajipaatalo nigijo noko, oada idioka limedi me gadexocitege Lionigi, codaa me Aneotedogoji ane Godiodi. ²⁵Joanigidaa ane ligege Aneotedogoji me najigotedogowa. Najigotedogowa godewiga ane digica liniogo miniwataga.

²⁶Jidikotibigagajitiwaji ejitece nigina oko anodoletibige metigadinaaleni. ²⁷Pida Liwigo Aneotedogoji ane yajigotedagawatiwaji idei catiwedi gadaalegenali, oada aleeditibigeeledi oko daga gadiigaxinitiwaji, igaataga Aneotedogoji Liwigo gadiigaxinitecetiwaji inoatawece ane leeditibige mowoogoti. Gadiigaxinitece anewi, codaa agodinaale. Enice oleetibige midioka limedi madinexocagatitege, nigijo anodaagee me gadiigaxinitetiwaji.

²⁸Enice ionigipi yemaanigipi, jemaa midioka limedi madinexocagatitege Cristo, amaleegaga abo gadaalegena nige dinikee, me daga adoitalo. Codaa me daga godiboliga nigejogota lodoe Cristo nigeno. ²⁹Owoogotitiwaji Cristo me igenaga. Oada ajawienatakanaga magagowoogoti minatawece nigina oko anidioka limedi mowo ane igenaga, Liwigo Aneotedogoji jegeo me micataga daga gela menitaciniwace nigidi oko.

Okolionigipi Aneotedogoji

3 ¹Owootiwaji Aneotedogoji Godiodi meliodi me godemaa. Ikee meliodi me godemaa nigina meetedogowa moko lionigipi, codaa ewi moko lionigipi. Nigina oko anida aneetege nigina iigo agetigodowoogodi, leegodi agoyowoogodi Aneotedogoji. ²Yokaagetepi yemaanigipi. Nigida moko jogoko lionigipi Aneotedogoji. Pida Aneotedogoji anaga ikee ica anodaagejinaga, pida jowoogotaga nigica Cristo nige dopitedijo, godiigi, eote me godiciagi, leegodi icota me jinataga nigica anodaageeteda. ³Inatawece nigina oko anonibeotege lanokegi Cristo idioka limedi me diniwilegitema inoatawece ane beyagi, digo mijoataga Cristo me yapidi, agica gaantokaagidi libeyacegegi.

⁴Nigina oko aneo libeyacegegi agaleegeyiwigadi liigenatakanegeco Aneotedogoji. Igaataga nigina me degejiwagatagateda Aneotedogoji liigenatakanegeco, oada joanigidaa nigina naga jaoga ane beyagi. ⁵Oada jogowoogotitiwaji Cristo menagi nigina iigo me noga gobeyacegeco, codaa Ijaagijoa agica libeyacegegi. ⁶Inatawece nigina oko anidioka limedi moyexogotege Cristo agidokida mowo ane beyagi. Pida nigina oko anidioka limedi meo ane beyagi agica daga nadi Cristo, otegexaagaga icoateda me yowoogodi Cristo.

⁷Ionigipi yemaanigipi. Jinigikani digica ane gadinaalenitiwaji. Nigina oko aneo ane igenaga, iniaagini igenaga, digo mijoataga Cristo me igenaga. ⁸Pida nigina oko anidioka limedi meo ane beyagi, бага nebi diaabo, igaataga diaabo jotigide negeo ane beyagi anigicatibige daga yoe Aneotedogoji nigina iigo. Joanigidaa leegodi Aneotedogoji Lionigi menagi nigina iigo, enagi me yaagadi libaketedi diaabo.

⁹Nigina oko ane lionigi Aneotedogoji agidioka limedi meo ane beyagi, igaataga anodaagee me yewiga liciagi anodaageeteda Aneotedogoji ane Eliodi. Odaa ayakadi digidioka limedi meo ane beyagi leegodi me lionigi Aneotedogoji. ¹⁰Joanigidaa me jakataga me jowoogotaga nigina oko ane lionigipi Aneotedogoji, inaagina nigina ane lionigipi diaabo; nigina oko ane degeo ane igenaga alionigi Aneotedogoji, otegeaagaga nigina oko ane daga yemaa nioxoa.

Adinemaanitiwagetiwaji

¹¹Nigijo natematigo anajipaatiwaji maleekoka anakatoniteda Goniotagodi yalagata me leeditibige me idinemaanagatiwage. ¹²Agele daga godiciagi Caim ane lionigi nigijo abeyacegegi, diaabo. Caim yeloadi epaa nioxoa. Igame leegodi ina me yeloadi? Yeloadi nioxoa leegodi Caim idioka limedi meo ane beyagi, pida nigijo nioxoa bigidioka limedi meo ane igenaga.

¹³Enice inioxoadipi, jinaga domaga alali nigina oko anida aneetege nigina iigo nige akaami nelegetedipi. ¹⁴Igaataga jowoogotaga naga godiwoko némaga, igaataga icaagica nige godeleo, pida idiokaanaga limedi me godewiga miniwataga Aneotedogoji, jowoogotaga leegodi me jemaanaga gonioxoadipi. Pida nigina oko ane daga yemaa nioxoa nige yeleo, odaa idioka limedi me leegitalo Aneotedogoji me yototedice. ¹⁵Nigina oko ane lelegedi nioxoa, aijekegi. Odaa owoogotitiwaji nigina aijekegi agica lewiga miniwataga Aneotedogoji.

¹⁶Nigida moko jowoogotaga Cristo me godemaa, leegodi dinajigo me yeleotedogodomi. Odaa oko leeditibige magaga godigo me godeleotema gonioxoadipi. ¹⁷Nigina liico nige nadi nioxoa midi ganigidi ane yopotibige, odaa yakakagaditema laalegena, agica meo daga iwikode, nigini liico ayakadi degee mewi me yemaa Aneotedogoji catiwedi laalegena. ¹⁸Ionigipi yemaanigipi. Ele me idinemaanagatiwage me digidokida gonioladi, nigina me jotaganaga. Pida jikeenaga mewi me idinemaanagatiwage nigina me jaogate niginoa ane godoenataka.

Ane leegodi mabo godaalegena lodoe Aneotedogoji

¹⁹⁻²⁰Nigida moko jowoogotaga moko nebi Aneotedogoji anewi, leegodi me idinemaanagatiwage. Pida nigina godaalegena me deemitece me jaoga ane beyagi, jakataga me jeloadagateenagatace godaalegena lodoe Aneotedogoji, igaataga Aneotedogoji yowoogodi inoatawece catedi niginoa ane jowoogotaga. ²¹Yemaanigipi yokaagetedipi. Nige deemitece godaalegena me daga jibataaga,

odaa abo godaalegena lodoe Aneotedogoji, ²²Odaa jibagatege inoatawece ane jipokagatalo Aneotedogoji, leegodi me jotetenaga liigenatakanegeco Aneotedogoji, codaa me jaoga aneo me ninitedibece. ²³Joanigidaa liigenatakanegegi, me leeditibige mejiwagataga Liboonagadi Lionigi, ane Jesus Cristo, codaa me idinemaanagatiwage, anagaga niigetedogowa ijaagijoa Cristo me jaoga. ²⁴Nigina oko aneyiwagadi liigenatakanegeco Aneotedogoji idioma limedi me yexogotege, codaa Aneotedogoji iniwa mijotaga. Jowoogotaga me iniwa catiwedi godaalegena leegodi Liwigo ane najigotedogowa.

**Ane jowoogotagatece nigina oko domigewi me eetece
ica Aneotedogoji ane iigete me yelogodi**

4 ¹Yokaagetedipi yemaanigipi. Jinaga domaga iwagati inoatawece niwicidi anowo nigina oko me notaganaga. Pida awinitece lotaga niginoa niwicidi, amanagawini owoogoti nigewi me icogotedigi miniwataga Aneotedogoji. Igaataga jegeliodi oko ilaagiteloco nigina iigo anodi moyelogoditedibece lowooko Aneotedogoji, pida niwitakaga. ²Joanigidaa owoogotitecetiwaji Aneotedogoji Liwigo nige niginiaagini iige nigina oko me dotaga. Nigina oko ane yelogoditebece Jesus Cristo menagi nigina iigo mewi me goneleegiwa, joaniginiaagini ini minitaga Niwigo, ane niwakatee Aneotedogoji. ³Pida nigina oko anee Jesus Cristo me daga goneleegiwateda menagi nigina iigo, joaniginiaagini nigini ini minitaga niwigo ane daga icogotigi miniwataga Aneotedogoji. Pida ini minitaga niwigo ane icogotigi mijotaga nigijo ane laxakawa Cristo. Nigida makaamitiwaji jagajipaata modi menagi nigica anenegegi lakapetegi Cristo, niginoa nokododi jiginitibige nigina iigo.

⁴Ionigipi yemaanigipi. Akaami nepilidi Aneotedogoji, codaa jegetigadiwokoni niginoa awitakaga anodi moyelogoditedibece Aneotedogoji lowooko. Igaataga Liwigo Aneotedogoji ane idej catiwedi gadaalegenali dagaxa meliodi loniciwaga, agabotege nigica niwigo ane idej digoina iigo. ⁵Niginoa awitakaga anodi moyelogoditedibece Aneotedogoji lowooko ida aneetege nigina iigo. Joanigidaa me liciagi me notaganaga nigina oko anida aneetege nigina iigo. Odaa nigina oko anida aneetege nigina iigo owatacotece, codaa odibatege ane lotaga. ⁶Pida bogoko nepilidi Aneotedogoji. Codaa nigina oko ane yowoogodi Aneotedogoji najipatogowa, codaa watacotogodici. Pida nigina oko ane daga yowoogoditeda Aneotedogoji baadaga najipatogowa. Joanigidaa jowoogotagatece oko nigewi mini minitaga Niwigo anewi, ogoa, domige ini minitaga niwigo awitakegi.

**Leeditibige me jemaanaga eledi oko digo
mijoataga Aneotedogoji me yemaa oko**

⁷Godokaagetedipi godemaanigipi. Ele me idinemaanagatiwage, igaataga Aneotedogoji jiginiaageote me jemaanaga eledi oko. Nigina oko ane yemaa eledi, joaniginiaa lionigi Aneotedogoji, codaa yowoogodi Aneotedogoji.

⁸Pida nigina oko ane daga yemaa eledi oko agica daga yowoogodi

Aneotedogoji, igaataga Aneotedogoji godemaa, codaa eote me jemaanaga eledi oko. ⁹Aneotedogoji ikee mewi me godemaa nigijo me niige nigijoa onijoatece me Lionigi menagi digoina iigo eotedibige me jakataga godewiga ane dagadiaagica liniogo miniwataga, leegodi Lionigi me yeletedogodomi. ¹⁰Odaa joanigidaa me jowoogotaga Aneotedogoji me yemaa inatawece oko. Anogokomogoko odoejegi me jemaanaga Aneotedogoji, pida Aneotedogoji odoejegi me godemaa, codaa niige Lionigi me yeleo leegotedi gobeyacegeco, odaa yeleo eotedibige Aneotedogoji me dagadiaa yelatetema gobeyacegeco.

¹¹Yokaagetedi yemaanigipi. Ja jinataga Aneotedogoji anigotedogowa me godemaa, odaa leeditibige magaga idinemaanagatiwage. ¹²Anigica ane nadi Aneotedogoji. Pida nige idinemaanagatiwage, odaa Aneotedogoji iniwa mokotaga, codaa jemaanaga eledi oko catiwedi godaalegena digo anigotedogowa Aneotedogoji me godemaa.

¹³Jowoogotaga me godexogotege Aneotedogoji, codaa magaga iniwa catiwedi godaalegenali, leegodi me najigotedogowa Liwigo. ¹⁴Okomogokota jinataga codaa me jelogotagatibece Aneotedogoji Godiodi me niige Lionigi meote lewiga inatawece oko. ¹⁵Nigina oko anee Jesus Cristo me Lionigi Aneotedogoji, iniwa Aneotedogoji minitaga, codaa yexogotege Aneotedogoji. ¹⁶Jowoogotaga, codaa ejiwagatakanaga Aneotedogoji me godemaa.

Aneotedogoji eliodi me yemaa inatawece oko. Nigina oko anidioka limedi me yemaa Aneotedogoji, codaa me yemaa eledi oko, idioka limedi me yexogotege Aneotedogoji, codaa Aneotedogoji iniwa minitaga. ¹⁷Aneotedogoji diba catiwedi godaalegenali eotedibige me jemaanaga eledi oko digo anigotedogowa me godemaa, eotedibige mabo godaalegena lodoe nigica noko nige iwi codaa me iloikatidi nigina oko leegotedi libeyacegeco. Abo godaalegena leegodi anodaagejinaga me godewiga liciagi Cristo anodaageeteda maleegijoa me yewiga digoina iigo. ¹⁸Nigina oko ane yemaa eledi oko adoita eledi oko. Igaataga nigina aneliodi me demaanaga, agalee yakadi daga doi catiwedi laalegena. Nigina oko ane doitalo Aneotedogoji, doitalo leegodi me yowoogodi Aneotedogoji micota me iloikatidi. Odaa nigina oko ane doi, ayemaa Aneotedogoji catiwedi laalegena.

¹⁹Nigida moko jemaanaga Aneotedogoji leegodi odoejegi me godemaa. ²⁰Nigica oko anee me yemaa Aneotedogoji, pida lelegedi nioxoa, nigini awitakegi. Igaataga nigina oko ane daga yemaa nioxoa anepigini me nadi, ayakadi daga yemaa Aneotedogoji anepaga digicoateda me nadi. ²¹Cristo najigotedogowa nigida niigenatakanegegi, nigina oko ane yemaa Aneotedogoji, leeditibige magaga yemaa nioxoa.

Oko ane igeke niginoa ane beyagi digoina iigo

5 ¹Inatawece oko anoyiwagadi Jesus nigijaagijoa nigicoa Cristo, ane niige Aneotedogoji meote godewiga, nigina oko anetiwigataka joaniginiaa lionigi Aneotedogoji. Nalagatibigiji nigina oko ane yemaa eliodi, aagaga yemaa eledi lionigipi nigini eliodi, ane nioxoadipi. ²Odaa nigina me jemaanaga

Aneotedogoji, codaa mejiwagataga liigenatakanegeco, aagaga jowoogotaga me jemaanaga niginoa eletidi lionigipi Aneotedogoji. ³Igaataga nigina mejiwagataga liigenatakanegeco Aneotedogoji, odaa jemaanaga Aneotedogoji, codaa adakake mejiwagataga liigenatakanegeco. ⁴Igaataga nigina oko ane lionigi Aneotedogoji yakadi me iḡeke niginoa lakataga ane beyagi nigina iigo. Nigina me jinakatonaga Goniotagodi, odaa jigidaa ḡodoniciwaga ane iḡeke niginoa ane beyagi digoina iigo. ⁵Nigina oko ane yakadi me iḡeke niginoa ane beyagi digoina iigo, inokina nigina oko aneyiwagadi Jesus me Lionigi Aneotedogoji.

Ane ikee anigijoa icoa Jesus Cristo

⁶Jesus Cristo nigijoa anijo menagi, odaa ikee mida aneeteḡe oko abeyacagaga nigijoa naga dinileḡete ninyogodi, codaa ibake epaa lawodi nigijoa noḡoyeloadi meote Aneotedogoji yakadi me napitagadi ḡobeyaceḡeco. Agidokida me dinileḡete ninyogodi, pida aagaga nadoogodi lawodi. ⁷Odaa Aneotedogoji Liwigo ikee mewi nigidaagee nigijoa Jesus menagi, igaataga Liwigo inoka ikee nigina anewi. ⁸Odaa idiwa iniwatadigini anoikee anewi; Aneotedogoji Liwigo, ninyogodi, codaa me lawodi. Nigidiwa iniwatadigini ilagatiwage, oniwoditema eledi.

⁹Ejiwagataga nigina oko moyalagata anonadi. Odaa leeditibige me jibagateḡe Aneotedogoji lotaga aneetece Lionigi, igaataga dagaxa me ḡoneḡegi nigina aneeteta Aneotedogoji, aliciagi niginoa lotaga oko. ¹⁰Aneotedogoji eetetece Lionigi catiwedi laalegena nigina oko aneyiwagadi Lionigi. Pida nigina oko ane deḡeyiwagadi ligegi Aneotedogoji, joaniginiaageo micataga Aneotedogoji daga awitakegi, leegodi ageyiwagadi nigica Aneotedogoji ane yalagate Lionigi. ¹¹Joanigidaa ane nikeetedogowa Aneotedogoji me najigotedogowa ḡodewiga ane dagadiaagica liniogo miniwataga, codaa nigida ḡodewiga icogotigi miniwataga Lionigi. ¹²Nigina oko aniniwa Aneotedogoji Lionigi minitaga joaniginiaagida lewiga ane digica liniogo miniwataga Aneotedogoji. Pida nigina oko ane digicoateda Lionigi Aneotedogoji minitaga, joaniginiaagini agica lewiga ane digica liniogo.

João yalagata ḡodewiga ane dagadiaagica liniogo miniwataga Aneotedogoji

¹³Jiditibigagaji nagadi notaganagaxi akaamitiwaji ane iwagati Lionigi Aneotedogoji, amaleegaga owoogotitiwaji mida ḡadewiga ane digica liniogo miniwataga, codaa amaleegaga idioka limedi me iwagati Goniotagodi.

¹⁴Nigina me jotaganegenaga Aneotedogoji, jinakatonaga me najipatedogowa okanicodaagica ane ḡodipoketegitalo, nigina me jipokagatalo nigica ane yemaa. ¹⁵Nige jowoogotaga me najipatedogowa nigina me jipokagatalo okanicodaagica, Odaa jowoogotaga me najigotedogowa nigica ane jipokagatalo.

¹⁶Nigica manatitiwaji ḡanioxoa aneo ane beyagi ane deḡeo oko me yeleo digidioka limedi me leegitalo Aneotedogoji me yototedice, leeditibige mipokiteloco nigini ḡanioxoa, odaa Aneotedogoji eote lewiga ane digica liniogo nigini ḡanioxoa. Pida ida nibeyaceḡegi aneo oko me yeleo midioka

limedi me yototedice Aneotedogoji. Odaa agejitagawatiwaji daga ipokiteloco lodoe Aneotedogoji nigina aneo nigida libeyacegegi. ¹⁷Inoatawece ane daga igenagateda, nibeyacaga. Pida inoa nibeyacegeco ane degeo oko me yeleo midioka limedita me leegitalo Aneotedogoji me yototedice.

¹⁸Jowoogotaga minatawece ane lionigipi Aneotedogoji agidokee mowo ane beyagi. Pida nigina oko ane lionigi Aneotedogoji epaa dinowedi, odaa nigijo diaabo, abeyacegegi, ayakadi daga itinege lewiga.

¹⁹Aagaga jowoogotaga moko nepilidi Aneotedogoji, pida inatawece oko anida aneetege nigina iigo iteloco Ioniciwaga nigijo abeyacegegi.

²⁰Codaa jowoogotaga Aneotedogoji Lionigi mewi mijoa menagi nigina iigo, codaa me najigotedogowa godixakedi, eotedibige me jowoogotaga Aneotedogoji anewi. Codaa godexogotege Nigijoa anewi, leegodi me godexogotege Jesus Cristo ane Lionigi. Iniaaginiwa, jiginiaaginiwa Gonoenogodi anewi, odaa ida godewiga ane dagadiaagica liniogo, leegodi etoko miniwataga, godexogotege.

²¹Yemaanigipi ionigipi, jinaga domigica mawiita niginoa niwicidi noenataka, igaataga aniginaagina anewi me gonoenogododi. Odaa jigidaagee. (Amém).